



15. Maj 2019

UPA 2019/30  
Aqqalu C.Jerimiassen

**Nuungaatsiarmit Illorsuarmit qimarnunneqarneranni, inuiaqatigiinniit inissanik taarsiiluni agguaassinermit neqeroorutaasut pillugit apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Karl-Kristian Kruse, Siumut)

17. juuni 2017 eqqaallugu qiaammertutut qiassamillu tupeqqajaalersutut misigiffiusaraaq. Pisoq aatsaanguartut pisutut eqqaamasuusitigiinnartutulluunnit ippara, pinngortitarsuatta qanoq nukittutigisinaanera aqussinnaannginneralu kingumut uppernarseqqiinnartarlutigu pisumi amiilaarnartumi uppernarsivarput. Alianaqisumillumi inuit inuunerinik sisamanik naleqarnera puigorneqanngisaannassaaq. Namminermit tamanna pisoq sakkortoqisumik misigisaqarfisavarattaq Nuugaatsiarmit nuliaqarama, misigissutsumillumi arlalippapiluunersuit ulloq manna tikillugu sulii piulersarneri isertuunneqarsinnaasanneqaaq.

Taamaattorli inuuneq ingerlaqqittartooq sulii uppernarseqqittarparput inuunermit ajorluinnartunik misigisaqarsimatillutaluunniit. Atassummiillumi taaminikkut pisorarnerani misiginneqatiginninnerput apississimavarputtaaq.

Misigissutsilli kisiisa aallaavigalugit nunarput aqussanngilarput pissusiviusullu qanimut eqqarsaatigilluartariaqarlugit, tassami qanoq annertutigisumik Avannaata Kommuniata iliuuseqarnera takussutissartaqarluareersoq puiginnarneqassanneqimmat. Tassaarsuaqareernerani piffissaq sivikitsuararsuaq atorlugu sulieriapiloorsimaneq inuppasuarnik toqqissilluni kialaartumi iserfissanik pilersitsinermik naleqarpoq, tamassumallumi kingorna piniutinik, angallatinik il.il annaaneqarsimasutut nalunaarsorneqarsimasunik taarsersuineq aallartinneqarsimalluni. Isertuunneqarsinnaangunanneqqaarlumi nunatsinni umiatsiaarniarfiit imaartitalallugit pisiortornerup ingerlanneqarsimanerani umiatsiat angissusaat ilaatigut assigiinngiaartitersinnaasarsimmata, qujamasuutissarli aana tassa aneq, inuussutissarsiutaannik unittuunnaqqunagit taarsiivigiortorneqarput.

Tassaarsuaqareernerani eqqungaasunut sulii assaq pingaarnepaaq Avannaata Kommunianiik tasaanikuuvoq illumik iserfissaqartinneqarnissai angerlarsimaffeeruttut, namminerlumi tamanna oqariartuummini erserpoq, illoqareersimagutta arlariinnik iserfissaqarluta sulii allatut ajornaqaaq atugassarititaasut tassa taamaapput. Naligiimmik sullissinissaq oqariartuutigineqarpoq, aap pingaaruteqarluinnarsimavoq sapinngisamik naligiikannersumik sullissiniarnissaq eqqugaasunut, pisorli taama angitigisillugu oqartarnerattuut ataatsikkut kikkut tamaasa nuannartinnissai ajornakusoorsimavoq. Eqqaariikkattuummi umiatsiaaqqat taarsersorneqarneranni nunatsinni umiatsiaarniat ipparluinnapajaarlugit pisiortorneq ingerlanneqarsimammat, tamassumunngalu



tunngatillugu ilai Kruger 6000-inappata ilai Poca 570-innappata, angissutsimikkut nikingasinnaapput taamaattorli isumagineqarneq piaartumik aallullugu ingerlanneqarsimanera qujanarnerpaavoq.

Qamuteralaat assigisaallu annaaneqarsimasuttaaq iliuuseqarfigineqalertorsimaqaat.

Taamaattumillu Atassummiik isumaqarluinnarpugut, oqaaseq “naligiimmik sullinneqarnissaat” eqqartussatillutigu ilanngullugu eqqarsaatigisariaqaripput qanoq annaasaqarsimaneq nalilersortariaanersoq. Atassutip pingaartilluinnarpaa angallatiminnik annaasaqarsimasut taarsiivigineqarsimanerat, illui imarsuarmut kuungunneqarsimasut pequtit tamarluinnaasa annaallugit eqqugaasimasut taarsiivigineqarneri.

Pigisaminnilli annaaneqarsinnaasunik assartuissunneqarsimasut Nuugaatsiami illuminnik illuminnik annaasaqartutuulli ikiorneqartigiinnarmata pigisaminnik tigusaqqissinnaatitaallutik, tamanna naligiimmik ikiuinertut Atassummiik erseqqissumik taarusupparput. Inuup inuunera nunap piinik taarserneqarinnaangilaq, inuup inuunera tamanik naleqarneruvoq, Avannaata Kommunia Naalackersuisullu uanga nammineq Nuugaatsiarmiumik nulialittut qamanngarujussuaq qujassutissaqarfigingaarpakka ikiuilertornermik suliaqarsimanerannut. Suliaq angeqaaq pisoq artornaraluartoq, eqqungaasulli tamarmik iserfissaqartinneqarlutik kialaartumik suli innarfissaqartinneqartuarnerat tunissut tamani annerpaavoq.

Tamannalu pillugu Atassummiik oqallisissiamik suliaqartoq qujaffigiumavarput, pisoq tamatsinnut tujorminarsimaqaaq inuunerli ingerlaqqittarpoq.

17. Juuni 2017 ajunaarsimasut eqqaaneri ataqqinartuulik.